

NO SOALAN : 150

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : BUKAN LISAN

**DARIPADA : TUAN FONG KUI LUN
[BUKIT BINTANG]**

SOALAN NO. 150

Minta **MENTERI PERUMAHAN DAN KERAJAAN TEMPATAN** menyatakan program pembersihan bandar terutama pengasingan sampah sarap pepejal dan plastik memandangkan warga kota dan bandar masih belum cukup kesedaran menjaga kebersihan.

JAWAPAN

Yang di-Pertua,

1. Untuk makluman Yang Berhormat, Program Pengasingan Sisa Pepejal di Punca telah diperkenalkan sejak 1 September 2015 di negeri-negeri yang mengguna pakai Akta Pengurusan Sisa Pepejal dan Pembersihan Awam 2007 (Akta 672) iaitu Wilayah Persekutuan Kuala Lumpur dan Putrajaya, Pahang, Negeri Sembilan, Melaka, Johor, Kedah dan Perlis.
2. Secara umumnya, program ini telah menunjukkan perkembangan yang positif dan tahap pengamalan masyarakat terhadap pengasingan sisa pepejal juga telah meningkat.
3. Menerusi Program Pengasingan Sisa Pepejal di Punca, para penduduk dikehendaki mengasingkan sisa pepejal mengikut kategori iaitu plastik, kertas dan lain-lain barangan kitar semula serta boleh memilih sama ada menjual barangan kitar semula kepada vendor kitar semula atau menghantar ke Pusat Kitar Semula atau diletakkan di hadapan rumah syarikat konsesi pada hari kutipan yang dijadualkan.
4. Hasil daripada program ini dan kempen kesedaran yang telah dijalankan, Kadar Kitar Semula Negara telah meningkat setiap tahun mulai 2015 daripada 15.7% hingga 24.6% pada tahun 2018.

Tahun	% Peningkatan	Jumlah sisa kitar semula (Juta tan)
2015	15.7	2.6
2016	17.5	2.8
2017	21	3.3
2018	24.6	3.8

Program Kesedaran

1. Bagi memperkukuhkan aspek pendidikan masyarakat, program kesedaran dijalankan secara menyeluruh seperti berikut:

a) Kempen kesedaran dan promosi faedah 3R (*Reduce, Reuse and Recycle*)

- Pemasangan papar iklan (billboard) dan iklan di pengangkutan awam;
- Iklan di surat khabar, televisyen dan radio; dan
- Kempen berterusan di media sosial (Facebook, Twitter, Instagram dan Youtube).

b) Pendidikan untuk pelbagai peringkat umur

- Modul Latihan Kelab Kitar Semula Sekolah Rendah dan Menengah;
- Modul Pengajaran dan Pembelajaran Pengurusan Sisa Pepejal dan Amalan 3R Merentas Kurikulum Prasekolah;
- Penubuhan Kelab Kitar Semula; dan
- Sesi ceramah dan pameran.

c) Program libat urus

- Pertandingan Kitar Semula Sekolah-Sekolah Peringkat Kebangsaan (PerKISS);
- Pertandingan membina arca daripada barangan kitar semula (*Waste To Art*);
- Program *Drive Thru* 3R;
- Program 3R bersama industri; dan
- Program 3R di pejabat Kerajaan.

d) Mendaya masyarakat

- Inisiatif Komuniti Sifar Sisa atau ZeComm khusus di kawasan Program Perumahan Rakyat (PPR);
- Pengkomposan sisa makanan dan “*Value Food No Waste*”; dan
- Gotong-royong bersama komuniti setempat.

e) Memperkasakan Akta 672

- Kerajaan sedang dalam proses untuk menaikkan kadar kompaun kepada mereka yang gagal mengasingkan sisa pepejal mengikut kategori yang ditetapkan.

f) Sambutan Hari Kitar Semula Kebangsaan

- Bagi mendekati masyarakat, sambutan Hari Kitar Semula Kebangsaan diadakan secara tahunan yang melibatkan orang awam dengan pelbagai pengisian aktiviti yang bermanfaat. Menerusinya masyarakat memperoleh maklumat dan inspirasi dalam membudayakan amalan kitar semula dalam kehidupan seharian.

g) Kempen Katakan Tidak Kepada Beg Plastik

- Kementerian juga telah melaksanakan Kempen Katakan Tidak Kepada Beg Plastik (*Say No To Plastic Bag*) selaras dengan usaha Kerajaan ke arah Plastik Pakai Buang Sifar (*Zero Single Use Plastics*) di Malaysia menjelang tahun 2030.

Program Pembersihan Bandar

1. Dalam konteks program pembersihan bandar, selain menyalurkan perkhidmatan kutipan sisa pepejal dan pembersihan awam, kempen pendidikan juga digerakkan secara komprehensif seperti berikut:

a) Perkhidmatan kutipan sisa pepejal dan pembersihan awam

- Perkhidmatan yang disalurkan meliputi 7 buah negeri di 53 bandar;
- Perkhidmatan pembersihan awam yang utama meliputi pembersihan jalan, longkang, tempat awam dan pemetongan rumput; dan
- Operasi kutipan sisa pepejal menggunakan sistem kutipan 2 + 1 iaitu 2 kali seminggu kutipan sisa domestik dan 1 kali kutipan sisa kitar semula.

b) Program pendidikan masyarakat

- Pelaksanaan kempen "Buang Sampah Ke Dalam Tong Sampah" dengan konsep utama melibatkan penduduk secara maksimum.

c) Penguatkuasaan Akta 672

- Bermula 1 Jun 2016, mana-mana isi rumah yang gagal mengasingkan sisa pepejal mengikut kategori yang ditetapkan berdepan dengan tindakan undang-undang. Sehingga 31 Mei 2019, daripada 557,986 premis yang telah diperiksa sebanyak 375 Notis Pemberitahuan

NO SOALAN : 150

Kesalahan (NPK) telah dikeluarkan dan sebanyak 220
Notis Tawaran Kompaun telah dijatuhkan.

Sekian, terima kasih.